

Considerando tuma paso legal contra Hulanda



ORANJESTAD — Aruba ta considerando pa tuma pasonan legal contra Hulanda. Esaki, pa cu violacion di interes y derecho civil di nos pais. Ayera nochi prensa Hulandes a publica cu 'Aruba lo no keda sin uza niun opcion politico, huridico of di

'volkenrecht' pa riba termino mas cortico termina e fayó di Consejo di Minister di Reino cu a wordo orkesta pa gobierno Hulandes.'

Lesa e detayenan riba pagina A2

Gobierno di Aruba considerando pasonan legal contra Hulanda

ORANJESTAD — Aruba ta considerando pasonan legal contra Hulanda, pa violacion di interesnan y derechonan civil di nos pais. Prensa Hulandes ayera nochi a publica cu 'Aruba lo no keda sin uza niun opcion politico, huridico of di 'volkenrecht' pa riba termino mas cortico termina e fayto di Consejo di Minister di Reino cu a wordo orkesta pa gobierno Hulandes'.

Kico exactamente e plan di gobierno di Aruba ta, lo bay wordo delinea awe mainta 8'or den sala grandi di Fort Zoutman pa prome minis-



ter Eman. Conferencia aki lo bay wordo 'streamed' pa Arubahuis na Den Haag na unda periodistanan Hulandes lo bay ta presente pa haci preguntanan directamente pa prome minister Eman.

'Metemento friu'

E comunicado ta elabora entre otro riba e manera den cual Hulanda lo a trata Aruba, prome minister Eman y su acercamentonan pa asina busca y haya mas puntonan comun. E aanwijzing di Hulanda y wantamento di firma riba presupuesto di 2014 dor di gobernador Refunjol riba orden di Hulanda no solamente ta perhudica Aruba na maneranan cu ta bay basta leu, pero tambe e propio interesnan comercial di companianan Hulandes, segun e comunicado. Prome minister Eman ta 'sumamente desa-

punta' di wak su esfuersonan pa haya acercamento entre paisnan den Reino wordo respondi cu 'metemento friu' for di Hulanda, pa cual riba dje no tin niun motibo.

E comunicado ta enfoca tambe riba con prome minister Eman ta mira su funcion como un manera pa combiba intensamente cu pueblo di Aruba, mirando tambe con su welo Henny, su tata Shon A y su ruman Henny a duna nan tempo y sacrificio na servicio di Aruba. E lucha cu a culmina den Status Aparte a cuminsa den su famia y p'esey prome minister Eman ta sinti su mes extra responsable pa autonomia di Aruba, asina e comunicado ta ilustra. "E welga di hamber di prome minister ta subraya su compromiso incondicional cu Aruba. Cu Hulanda te

aworaki ta hala su schouder pa esaki ta marca un distancia desinteresa na luga di un conexion amistoso y mutuamente fructifero", segun e comunicado.

Prensa local ignora

Mester bisa cu prensa local solamente a haya un invitacion pa e conferencia di prensa aki, sin wordo divulga riba topico y contenido di dje, mientras cu pa prensa Hulandes a manda un relato completo. Pero pasobra por ehempel servicio di noticia di agencia ANP y Algemeen Dagblad na Hulanda a publica caba, Bon Dia Aruba a logra haya e informacion aki, a pesar cu miembronan di oficina di publicidad di prome minister y te hasta un minister a nenga di confirma e noticia of duna mas informacion. □